

Siunnersuummut oqaaseqaatit

Nalinginnaasumik oqaaseqaatit

1. Aallaqqaasiut

Siunnersuut Unammilleqatigiinneq pillugu Inatsisartut inatsisaannut nr. 1, 15. maj 2014-imeersumut aalajangersakkamik ilassusiivoq, qularnaarisumik inuussutissarsiutit aalajangersimasut – attaveqaatit aalajangersimasut aqputaanik elektroniskiusunik inuussutissarsiutinik ingerlatsisuusut aamma kiffartuussinernik suliaqartut pillugit pisortat unammilleqatigiinnerup aqunneqarneranik suliaqarnerisa aningaasalersorneqarnissaanik.

Tamatuma saniatigut KANUKOKA-p 2018-ip aasaani atorunnaarnera tunngavigalugu, Unammilleqatigiinnermut Ataatsimiititaliami ilaasortanik toqqaasarneq pillugu § 27, siunnersuummi allanngortinneqarpoq.

Inatsisit atuuttut

Nalunaarasuartaaserinermik inuussutissarsiortut aningaasalersorpaat Nalunaarasuartaateqarnermi Aqutsisoqarfik, Nalunaarasuartaateqarnermi Maalaaruteqartarfik soorlu Nalunaarasuartaatitigut atassuteqarneq nalunaarasuartaatitigullu kiffartuussinerit pillugit Inatsisartut inatsisaat nr. 31, 23. november 2017-imeersumi § 26-imi tamanna allassimasoq.

Unammilleqatigiinnermut Ataatsimiititaliap ilaasortassanik siulittaasusnaanillu toqqaasarneq § 27-imi aalajangersagaavoq, tassanilu Naalakkersuisut KANUKOKA-lu peqatigiillutik Unammilleqatigiinnermut Ataatsimiititaliami ilaasortassamik pisortat suliffeqarfeqarfiini immikkut ilisimasalimmik toqqaasarlutik.

2. Siunnersuummi immikkoortut pingaarnerit

Siunertaa

UKA2017-imi Inatsisartut inatsisaat nutaaq nalunaarasuartaateqarnikkut aamma nalunaarasuartaaserinermi kiffartuussinernut tunngasoq akuersissutigineqarpoq, inatsisitigut siusinnerusukkut atugassarititaasimasunik ingerlatitseqqittoq, nalunaarasuartaaserinermik inuussutissarsiorderup Nalunaarasuartaateqarnermut Aqutsisoqarfimmik, Nalunaarasuartaateqarnermut atatillugu maalaaruteqartarnermut ataatsimiititaliamik pilersuinermilu amigartoorutaasinnaasunik aningaasalersuinerimik imaqartoq. Tamakkua pinerat ilutigalugu unammilleqatigiinnermut inatsit allannguuteqartinneqarpoq imaalillugu, Nalunaarasuartaateqarnermut naammagittaalliuteqartarfik aamma attaveqaatinik ataatsimoorussamik atuinermut atatillugu suliassat aamma akinut aamma atugassarititaasunut

tunngatillugu suliat attaveqaatinik ataatsimoorussamik atuinnermut atatillugu, nuunneqarlutik Nalunaarasuartaaserinnermut Aqutsisoqarfimmiit, Atuisartoqartarnermut Unammilleqatigiinnermullu Aqutsisoqarfimmut.

Pineqartoq tassaavoq akitsuummik akiligassiisarneq Nalunaarasuartaaserinnermik Aqutsisoqarfiup allanullu nalunaarasuartaaserinnermi pisortatut suliaannut matussutissiiniarluni. Akiligassiisarneq, nalunaarasuartaatitigut atassuteqarneq nalunaarasuartaatitigullu kiffartuussinerit pillugit Inatsisartut inatsisaanni nr. 31, 23. november 2017-imeersumi pineqartup assigisaa, tassani pineqarpoq.

Akiliut ukiuni arlaqartuni atortooreersimavoq, inatsisissatullu siunnersuummi allanngortinneqarani. Inatsisissatut siunnersuutikkut taamaallaat qularnaarniarneqarpoq akiliut allannguuteqanngitsoq eqqortumik agguanneqartassasoq, Nalunaarasuartaaserinnermut Aqutsisoqarfiup aamma Atuisartoqarnermut Unammilleqatigiinnermullu Aqutsisoqarfiup akornanni, suliaassanik agguassineq atortuusooq naapertorlugu.

Tamatuma saniatigut § 27-imik nalilersueqqittoqartariaqarnera ersarissisimavoq, tamatumani Kommunit Kattuffiata (KANUKOKA-p) julip 31-iani 2018-imi atorunnaarnera tunulequtaalluni. § 27-imi maannakkut aalajangersakkami tunngavissinneqarpoq, Naalakkersuisut KANUKOKA-lu peqatigiillutik ilaasortamik ataatsimik immikkut pisortat inuussutissarsiornermik ingerlatsinerannik ilisimasaqartumik Unammilleqatigiinnermut Ataatsimiititaliamut toqqaanissamut pisinnaatitaasut.

Taamaattumik siunnersuutigineqarpoq ilaasortaq ataaseq immikkut pisortaani inuussutissarsiornermik ingerlatsivinnut tunngasunik ilisimasaqartoq toqqarneqartassasoq Naalakkersuisunit aamma kommuninit ataatsimoortumik inassuteqartoqarneratigut, qularnaarumallugu Unammilleqatigiinnermut Ataatsimiititaliaq suli pisortat inuussutissarsiornermik ingerlatsiviinut tunngasunik ilisimasaqartuussasoq. Taamaasilluni siunnersuut KANUKOKA-p 2018-ip aasaasani atorunnaarnerata kingunerisaanik iluarsineruvoq, qularnaarillunilu kommunit suli Unammilleqatigiinnermut Ataatsimiititaliami sunniuteqarnissaannik.

Siunnersuut inatsisinut atuuttunut sanilliullugu	
<i>Inatsisip atuuttup oqaasertai</i>	<i>Siunnersuut</i>
	§ 1
	Unammilleqatigiinneq pillugu Inatsisartut inatsisaanni nr. 1, 15. maj 2014-imeersumi (unammilleqatigiinnermut inatsit), Inatsisartut inatsisaatigut nr. 24, 17. november 2017-imeersukkut allanngortinneqartumi, tulliuuttut allanngortinneqassapput:

	<p>1. § 23 r-ip kingorna ikkunneqassaaq:</p> <p><i>”Suliassaqarfimmi aalajangersimasumi unammilleqatigiinnermik aqutsinerup aningaasalersorneqarnera</i></p> <p>§ 23 s. Nalunaarasuartaaserinermik inuussutissarsiutit aningaasalersorpaat Atuisartoqarnermut Unammilleqatigiinnermullu Aqutsisoqarfiup suliai attaveqaatinik ataatsimoorussamik atuinnermut, naatsorsuuserinermut aamma attaveqaatinik atuinnermi akinut aamma atugassarititaasunut sulianik suliarinnittarnermut atatillugu aningaasartuutai.</p> <p><i>Imm. 2.</i> Imm. 1-imi pineqartut aningaasalersornissaannut akiliummik akiligassiisoqartassaaq ungasissumut attaveqaatinik atuinnermut, attaveqaatinik neqerooruteqartartumit akilerneqartartumik Atuisartoqarnermut Unammilleqatigiinnermullu Aqutsisoqarfimmut, takuuk § 23 j.</p> <p><i>Imm. 3.</i> Imm. 1 naapertorlugu akiliut aningaasanut inatsimmi aalajangerneqartarpoq. Akiliut akiligassiissutigineqartassaaq attaveqaatinik annertuukkaartumik neqerooruteqartartumut.”</p>
<p>§ 27. Unammilleqatigiinnermut Ataatsimiititaliaq siulittaasoqarpoq aammalu 6-inik ilaasortaqaarluni. Siulittaasoq aamma ilaasortat piffissamut ukiut 4-it tikillugit sivisussusilimmut Naalakkersuisunit toqqarneqassapput. Unammilleqatigiinnermut Ataatsimiititaliaq pisortani namminersortunilu inuussutissarsiornermi suliffeqarfinnut tamatigoortumik ilisimasaqassaaq, ilanngullugu pissutsit inatsisilerinermut,</p>	<p>2. § 27, imatut oqaasertalerneqassaaq:</p> <p>” § 27. Unammilleqatigiinnermut Ataatsimiititaliaq siulittaasoqarpoq aammalu arfinilinnik ilaasortaqaarluni.</p> <p><i>Imm.2.</i> Siulittaasoq aamma ilaasortat piffissamut ukiut 4-at tikillugit sivisussusilimmut Naalakkersuisunit toqqarneqartarput.</p> <p><i>Imm. 3.</i> Unammilleqatigiinnermut</p>

<p>aningsaasaqarnermut, aningsaasalersuisarnermut aamma atuisartoqarnermut tunngassuteqartut. Siulitaasoq aamma Unammilleqatigiinnermut Ataatsimiititaliami ilaasortat pingasut inuussutissarsiornermi atuisartoqarnermilu soqutigisaqarnermut attuumassuteqassanngillat. Ilaasortaq ataaseq inuussutissarsiornermut kattuffinnit ataatsimoortunit inassuteqarnerat malillugu, ilaasortaq ataaseq atuisartoqarnermut kattuffinnit ataatsimoortuni inassuteqarneq malillugu aamma ilaasortaq ataaseq immikkut pisortat inuussutissarsiornermik ingerlatsinerannik ilisimasaqartoq Naalackersuisut aamma KANUKOKA-p ataatsimoorlutik inassuteqarnerat malillugu Naalackersuisut toqqassavaat. Unammilleqatigiinnermut Ataatsimiititaliami ilaasortat inuttut suliatigullu piginnaasaqarnerat tunngavigalugu toqqarneqassapput, aammalu sulinerminni arlaannaannulluunniit attuumassuteqanngitsumik atuutissallutik.</p>	<p>Ataatsimiititaliaq pisortani namminersortunilu inuussutissarsiornermi suliffeqarfinnut tamatigoortunik ilisimasaqassaaq, ilanngullugu pissutsit inatsisilerinerneq, aningsaasaqarnermut, aningsaasalersuisarnermut aamma atuisartoqarnermut tunngassuteqartut ilisimasaqarfigissallugit.</p> <p><i>Imm. 4.</i> Siulitaasoq aamma Unammilleqatigiinnermut Ataatsimiititaliami ilaasortat minnerpaamik pingasut inuussutissarsiornermi atuisartoqarnermilu soqutigisaqarnermut attuumassuteqassanngillat.</p> <p><i>Imm. 5.</i> Naalackersuisut ilaasortaq ataaseq inuussutissarsiornermut kattuffiit ataatsimoortut inassuteqarnerat malillugu, ilaasortaq ataaseq atuisartoqarnermut kattuffinnit ataatsimoortunit inassuteqarneq malillugu toqqassavaat, aammalu ilaasortaq ataaseq immikkut pisortat inuussutissarsiornermik ingerlatsinerannik ilisimasaqartoq Naalackersuisut aamma kommunit ataatsimoorlutik inassuteqarnerat malillugu toqqarneqartassaaq.</p> <p><i>Imm. 6.</i> Unammilleqatigiinnermut Ataatsimiititaliami ilaasortat inuttut suliatigullu piginnaasaqarnerat tunngavigalugu toqqarneqartarput, aammalu sulinerminni arlaannaannulluunniit attuumassuteqanngitsumik atuutissallutik.”</p>
	<p style="text-align: center;">§ 2</p> <p>Inatsisartut inatsisaat 1. juli 2019-imi atutilissaaq.</p>

3. Aningsaasaqarnikkut allaffissornikkullu pisortanut kingunerisassai

Attaveqaatinik neqerooruteqartartut ungasissumut attaveqaatinut akitsuummik akiliuteqartinneqartalernissaannik siunnersuutikkut naatsorsuutigineqarpoq Atuisartoqarnermut

Unammilleqatigiinnermullu Aqutsisoqarfiup sulianik ingerlatsineranut atatillugu aningaasalersuinissaq aqutissiuunneqassasoq, suliassaqarfimmi immikkoortumi tassani unammilleqatigiinnerup elektroniskiusunik attaveqaatinik aamma kiffartuussinernik ingerlatsineranut atatillugu pisortani suliassanut tunngatillugu. Ilutigisaanik apparneqarpoq ungasissumit attaveqaatinut akitsuut, Nalunaarasuartaaserinermik Aqutsisoqarfiup aningaasalersorneqarneranut akiligassiissutigineqartartoq, ataatsimoortumik attaveqaatinik ingerlatsineranut tunngasumik suliassat Atuisartoqarnermut Unammilleqatigiinnermullu Aqutsisoqarfimmut nuunneqarnikummata, taamalu Nalunaarasuartaaserinermut Aqutsisoqarfimmit isumagineqarunnaarlutik.

Ataatsimut naatsorsuutigineqanngilaq siunnersuut annerusunik aningaasartuutitigut imaluunniit allaffissornikkut pisortanut kinguneqarnissaa.

4. Inuussutissarsiortunut aningaasaqarnikkut allaffissornikkullu kingunerisassai

Naatsorsuutigineqanngilaq siunnersuutip inuussutissarsiortunut aningaasaqarnikkut allaffissornikkullu kinguneqarnissaa, tassami Nalunaarasuartaaserinermut Aqutsisoqarfiup pissarsiassaa assigisaanik annikillineqarmata.

5. Avatangiisinut, pinngortitamut inuillu peqqissusaanut kingunerisassai

Naatsorsuutigineqanngilaq siunnersuutip pinngortitamut imaluunniit inuit peqqissusaannut kinguneqarnissaa.

6. Innuttaasunut kingunerisassai

Naatsorsuutigineqanngilaq siunnersuutip innuttaasunut kinguneqarnissaa.

7. Allatut pingaarutilimmik sunniutaasinnaasut

Siunnersuut allatigut pingaarutilinnik sunniuteqassasoq naatsorsuutigineqanngilaq.

8. Pisortanut suliniaqatigiiffinnullu tusarniaaneri il.il.

Siunnersuut piffissami 10. december 2018 -imiit 10. januar 2019 -imut tusarniaavigineqartartuni tulluuttuni tusarniaassutigineqarsimavoq:

Kommune Qeqertalik, Qeqqata Kommunia, Kommuneqarfik Sermersooq, Kommune Kujalleq, Avannaata Kommunia, Sulisitsisut, Eqqartuussissuserisut Kalaallit, TELE-POST aamma Namminersorlutik Oqartussani Naalakkersuisoqarfiit tamarmik.

Siunnersuullu aamma piffissami pineqartumi Naalakkersuisut tusarniaasarnermut quppersagaanni tamanut takusassiarineqarsimavoq.

Ukunanga tusarniaanermi akissutinik tigusaqartoqarpoq:

Sulisitsisut aamma Kommuneqarfik Sermersooq.

Tulliuttuni tusarniaanermi akissutaasut allannguutissatullu siunnersuutit tusarniaanermut atatillugu tiguneqartut sammineqassapput. Oqaatigineqassaaq tusarniaanermi akissutaasut allataatsimik uingasumik allatat taamaallaat pingaarnersiulluni issuaaneruset. Naalakkersuisut tusarniaanermi akissuteqaataat allataatsimik uingasumik nalunaarsorneqanngillat.

Sulisitsisut nalunaarfaat pissusissamisuumngitsoq nalunaarasuartaaserinermik inuussutissarsiortut aningaasartuutissaannik nutaanik nammagassinneqarnissaat, pisortat karsiinit isumagisassaasunik.

Siuliani tusarniaanermi akissutaasut tunuliaqutaralugit oqaaseqaatit naleqqussangaatsiarneqarput. Taamaasilluni ersarissumi takuneqarsinnaalerpoq nalunaarasuartaaserinermik inuussutissarsiortunut akiliutissaq nutaaq pineqanngitsoq. Akiligassiissut nalunaarasuartaaserinermik inuussutissarsiummut ukiualussuarni pioreersimavoq, inatsisissatullu siunnersuutikkut allangortinneqassanani. Inatsisissatut siunnersuut taamaallaat siunertaqarpoq qularnaarinissamik akiliutissap eqqortumik avinneqarnissaanik, Nalunaarasuartaaserinermi Aqutsisoqarfiup aamma Atuisartoqarnermut Unammilleqatigiinnermullu Aqutsisoqarfiup akornanni, suliassanik agguaassineq atuuttoq naapertorlugu.

Kommuneqarfik Sermersooq § 27-imi allannguinermut tunngatillugu nalunaarpoq, nammineq isumartik malillugu kommunit nammineerlutik inassuteqartassasut, Unammilleqatigiinnermut Ataatsimiititaliami ilaasortassamik ataatsimik. Tamatumunnga tunngavigineqarpoq kommunit namminneq susassarisariaqaraat kommunit sinnerlugit ilaasortaasussanik toqqaasarneq.

Unammilleqatigiinnermut ataatsimiititaliami katillugu ilaasortat pingasuupput, siulleq inuussutissarsiortunit inassutigineqartarluni, aappaat atuisartut kattuffiinit / peqatigiiffiinit, kingullerlu pisortaniit, taamalu Naalakkersuisunit aamma kommuninit peqatigiilluni inassutigineqartarluni. Taamaasilluni inuussutissarsiortut, atuisartut aamma pisortat naligiimmik Unammilleqatigiinnermut Ataatsimiititaliami sinniisoqarput. Ilaasortap Naalakkersuisunit aamma kommuninit inassutigineqartup kommunit kisiisa sinniisuuffiginngilai, kisiannili taamatulli aamma Naalakkersuisut. Taamaattumillu Naalakkersuisut aamma akulerunneqartariaqarput kina Naalakkersuisut sinnerlugit inassutigineqarnissaanut.

Siunnersuummi immikkoortunut ataasiakkaanut oqaaseqaatit

§ 1-mut

Nr. 1-imut (§ 23 s)

Imm. 1-mut.

Nalunaarasuartaaserinermik inuussutissarsiutit aningaasalersorpaat Atuisartoqarnermut Unammilleqatigiinnermullu Aqutsisoqarfiup suliai, attaveqaatinik ataatsimoorussamik atuinermut, naatsorsuuserinermut aamma attaveqaatinik atuinermi akinut aamma atugassarititaasunut sulianik suliarinnittarnermut atatillugu aningaasartuutit. Ileqqoq taanna nunarsuatsinni sumiiffinni amerlasuuni atugaavoq. Ungasissumut attaveqaatit tassaapput nalunaarasuartaatitigut attaveqarneq illoqarfiit aamma nunaqarfiit akornanni, kiisalu nunanut allanut aamma nunanit allaniit.

Imm. 2 aamma 3-mut

Akiliutip annertussusia Aningaasanut Inatsimmi ukiumoortumik aalajangersarneqartassaaq. Akiliut akiligassiissutigineqartassaaq ungasissumut attaveqaatinut akitsuutitut, attaveqaatinik nioqquteqartunut, taamatut aaqqissuussinikkut allaffissornikkut aningaasartuutissat annikinnerutinneqassammata, ilutigisaanillu kiffartuussinernik ungasissumut attaveqaatinik neqerooruteqartartut tamarmik naapertuuttumik akileeqataasassallutik. Akiliutit annertussusissaannik assigiinngitsunik ungasissumut attaveqaatit ilaannut assigiinngitsunut aalajangersaasoqarsinnaavoq.

Nr. 2-mut (§ 27)

Imm. 1 aamma 2-mut

Aalajangersagaq § 18-imik Unammilleqatigiinneq pillugu Inatsisartut Inatsisaanni nr. 16, 19. november 2007-imeersumik ingerlatitseqqinneruvoq.

Unammilleqatigiinnermut Ataatsimiititaliami ilaasortat amerlassusaat allannguuteqartinnagu ingerlatiinnarneqassasoq siunnersuutigineqarpoq, unammilleqatigiinnermut inatsimmut maanna atuuttumut sanilliullugu. Ilanngullugu siunnersuutigineqarpoq ataatsimiititaliami siulittaasoq aamma ilaasortat toqqarneqartassasut piffissamut ukiut 4-at angullugit sivisussusilimmut.

Imm. 3 aamma 4-mut

Unammilleqatigiinnermut Ataatsimiititaliami sinniisut inuiaqatigiinni suliassa qarfinnut assigiinngisitaartunut attuumassuteqartut peqataasariaqarput. Siunnersuutigineqarpoq Unammilleqatigiinnermut Ataatsimiititaliamut ilaasortassat inassutigineqartassasut inuit pineqartut ataatsimut naliliivigineqarneri inuttut suliassa qarfinnullu piginnaanerit pigisaat naapertorlugit, inuussutissarsiordermi, atuisartuni, aningaasarsiordermi aamma inatsisilerinermi pissutsinut tunngasuni, kiisalu pisortat suliffiutaannut tunngasunik, Unammilleqatigiinnermullu Ataatsimiititaliami sulinerminni arlaannaannulluunniit atasuunatik ingerlatsisassasut.

Taamaasilluni siunnersuut naapertorlugu Unammilleqatigiinnermut Ataatsimiititaliami ilaasortat pingasuussapput kiisalu siulittaasoq, inuussutissarsiortut aamma atuisartut soqutigisaannut attuumassuteqanngitsut. Inuussutissarsiortunut imaluunniit atuisartunut attuumassuteqartutut pituutaqarnertut isigineqassagaanni kattuffimmi immikkut soqutigisanik isumaginnittuusumi atorfeqartariaqarpoq inuussutissarsiuteqartariaqarluniluunniit. Taamaattumillu ilaasortaq mattunneqassanngilaq pissutigiinnarlugu tamakkiisumik ilaannakuusumilluunniit inuussutissarsiornikkut ingerlatsivimmi ingerlatsisuummat, imaluunniit nioqqutissanik kiffartuussinernillu atuisartuummat.

Imm. 5-imut

Naalakkersuisut ersarinnerusumik aalajangersagalioreernerisigut, Naalakkersuisut ilaasortamik ataatsimik toqqaassapput inuussutissarsiornikkut kattuffiit inassuteqarnerisigut, assersuutigalugu sulisitsisut, ILIK aamma NUSUKA ataatsimoorlutik, ilaasortamik ataatsimik atuisartut kattuffiisa peqatigiillutik inassuteqarnerisigut, aammalu ilaasortamik ataatsimik pisortat inuussutissarsiornermik ingerlatsiviinut immikkut ilisimasaqartumik, Naalakkersuisut aamma kommunit peqatigiillutik inassuteqareernerisigut.

Imm. 6-imut

Naammagittaalliuuteqartarfiup suliaqarneranut aamma soqutiginnitsit Naammagittaalliuuteqartarfimmut tatiginninnissaat eqqarsaatigalugu pingaartuuvoq ilaasortaasut Naammagittaalliuuteqartarfimmi sulinerminni arlaannaannulluunniit attuumassuteqaratik sulissasut. Tamanna ilaatigut isumaqarpoq suliani ataasiakkaani tamani sukumiisumik isumaliutigineqartassasoq ilaasortaq suliami illua'tungeriiusut soqutigisaannut akerliusunik imaluunniit assigiinnik soqutigisaqarnerisigut. Tamanna taamaannersoq taamaanginnorsorluunniit apeqqutaatinnagu aamma isumaliutigisariaqarpoq ilaasortat ilaat suliami peqataatinneqassanersigut saqquminera imaassorinarpat sulinermini arlaannaannulluunniit attuumassuteqanngitsigut.

§ 2-mut

Siunnersuutigineqarpoq Inatsisartut Inatsisaat 1. juli 2019 atuutilissasoq.